

habenn, mit eingerechend. Und dieselbigen zcinse und zcinsguetter mit allen und iczlichen iren vorgerurthen herlikeithen und zugehorungen sollen furbasser ligen in iren stadtrechte und allein mit yn dienen und leiden und sullen erben und gefallen, szo oft sie sich von todes wegen vorledigen, auf den nhesten erben, es sey manlichs ader weiplich
 5 geschlechte, gleich andern ir erb und guetter, und sollen furbasser mher, ßo sie ein burger zu Camentz dem andern vorkaufft, vorwechseldt ader nach seim tode erblich stammeth und bringet, gewandeldt oder auffgereicht werden vor richter und scheppen und gehegethen dinge der gnanthen unser stad Camentz und domit volkomlich macht haben, einer iczlichen personen derselben unser stad Camentz zu besitzen und gerucklichen
 10 zu haben nach der stad recht ungehindert. Und wer es, ap derselben zcyns ader zcynsgueter imandes durch uns gegeben weren oder noch von uns ader unser nachkomen zu angefelle in kunfftigen zzeiten vorlihen ader gegeben wurden, das lehen und die gabe und alle ire brieffe, die daruber gegeben weren ader daruber gegeben wurden, sollen krafftloes, vornicht, todt und ab sein. Auch wurden der zcyntse ader zcynsguetter icht
 15 vorkaufft ader vorwandelt, also das sie kemenn auff unser manne eyner (*sic*) ader mher, der oder dieselben sollen sie von uns ader unser nochkomen kunigen zu lehen entpfhohen und uns dovon dienen und thun, wie sich gebureth. Were es auch, das die zcal hundert schock groschen des ehegenanthen zcinses ader zcinsguetter nicht volkomen weren ader in zukunfftigen zzeiten vorwandelt wurden mit kouffen, wechseln ader mit andern ge-
 20 schichten, szo sollen und mogen sie ander zcyntse ader zcynsguetter, alsoviel biß das die zcal erfulleth wirdt, kouffen. Dabey sullen sie und ire nachkumen hynfure in geruglicher besitzung vor allermeniglich ungehindert bleyben, doch unschedelich uns und der kronen zu Behmen an unser diensten und an andern herlikeythen an schaden. Und gebiethen darauff allen und itzlichen unßern hewblewthen — und sonderliche unserm voyte
 25 der sechsstete —, das sie die obgenanthen unser burger zw Camentz an der eegenanthen unser begnadung nicht hindern noch irren, sonder sie dabei beschutzen, beschirmen und geruglich beleiben lassen, als lieb einem yden sei, unser schwere ungnadt zu vermeiden. Mit urkundt dieses brieffes vorsigelt mit unßerm kuniglichen anhangenden insigel. Geben zu Ofen sontags vor Simonis und Jude der heiligen zwelffbothen nach Cristi
 30 geburdt tausendt funffhundert und im ersten, unßer reiche des Hungerischen im zwelfften und des Behemischen im ains und dreissigsten jaren.

Ex commissione propria majestatis regie per Johannem Schlechtam
 secretarium majestatis sue cancellarie Boemicalis.

190.

35 *Bericht über das goldene oder Jubeljahr.*

1501.

Häskr.: Kamener Stadtbuch 3,144.

Das gulden jar und centesimum.

Anno 1c. xv^c, so die wutreichenn, grausamen hunde, die Turckynn, die cristglowbigenn menschen grawßammcklich invasirt, devastirt und vorbrant unnd vil landis